

PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGGAL PERTAMA,
PARLIMEN KEEMPAT BELAS

PERTANYAAN : LISAN

DARIPADA : DATO' TAKIYUDDIN BIN HASSAN
[KOTA BHARU]

TARIKH : 10 JULAI 2019 (RABU)

SOALAN NO. 73

Minta **PERDANA MENTERI** menyatakan sebab munasabah mengapa peguam Syazlin binti Mansor diarahkan untuk menarik diri daripada mewakili KPKT, Jabatan Bomba dan Penyelamat dan prosiding Inkues kematian Allahyarham Muhammad Adib bin Mohd Kassim selepas prosiding berlangsung selama 36 hari dan hampir tamat.

JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JPM

Tuan Yang di-Pertua,

1. Jabatan Peguam Negara telah bertindak mengikut undang-undang apabila tidak membenarkan peguam terdahulu untuk meneruskan mewakili Kementerian Perumahan dan Kerajaan Tempatan serta Jabatan Bomba dan Penyelamat Malaysia. Keputusan Jabatan Peguam Negara juga mengambil kira kepentingan semua pihak yang terlibat dalam inkues dan juga kepentingan orang ramai.

2. Pada peringkat permulaan pelantikan peguam yang mewakili Kementerian Perumahan dan Kerajaan Tempatan dan Jabatan Bomba dan Penyelamat Malaysia dikira sebagai dibuat secara bona fide untuk membantu prosiding mahkamah.

3. Walau bagaimanapun, dalam prosiding inkues khususnya semasa pakar forensik patologi dari Hospital Kuala Lumpur dipanggil semula untuk memberikan keterangan, peguam tersebut telah bertindak dengan cara yang tidak wajar dan tidak sesuai sebagai seorang peguam yang mewakili kementerian dan jabatan kerajaan.

4. Antara contoh tingkah laku peguam tersebut yang menjadi isu adalah seperti yang berikut:

- a. Beliau mendakwa bahawa pegawai pengendali inkues berat sebelah dalam mengendalikan prosiding inkues itu. Dakwaan tersebut telah dibuat di hadapan Koroner dan Hakim Mahkamah Tinggi semasa permohonan untuk memanggil semula saksi pakar dari Hospital Kuala Lumpur. Walaupun kedua-dua mahkamah telah menolak hujah beliau mengenai isu ini, tuduhan beliau tersebut telah mencemarkan integriti dan imej pegawai pengendali inkues dan Jabatan Peguam Negara;
- b. Beliau telah mendedahkan mesej peribadi antara beliau dengan pegawai pengendali inkues yang terdahulu semasa inkues dijalankan di mahkamah, dan ini suatu perbuatan yang sangat tidak beretika; dan
- c. beliau juga telah mencabar dan menghina pakar forensik patologi yang merupakan pegawai perubatan daripada Kementerian Kesihatan semasa saksi ini di panggil semula ke mahkamah untuk memberikan keterangan dan perbuatan beliau itu tidak dapat diterima sebagai seorang yang mewakili suatu Kementerian lain.

Sekian, terima kasih.